

كانت الشمس بعدا ع المقلب الشرقي، ودفا نيسان بلش يمسح اللي بقي هون وهون من حزن الشتى.
قلت للقصيدي البعدي عم إكتبا: نُطريني تَ إرجع.
طبشت الباب، حطيت المنجل بزّاري تَ قصّ عصا للمعول.
ويلاً يا إجريي خدوني عالحرش، حابب إمشي وإسمع دعستي مثل قت الكنت صبي.

اللي بيروح عالحرش بيفكر حالو وحدو، ما بيشفوف الموكب الماشي معو:
العصافير العم يطيرو ع مدا جوانخن، فروخ السني العم يتعلمو أبجدية الفلا والمسافي، الفراشات البيعشو من الضو، صف
النمل العم يزقّ موني لضيعتو الزغيري تحت الأرض، سقاية الحفي الما بتعرف أيمني بتشّب عليا الحيّي وبتبلعا^(٢٥) الحردون
الواقف ع الشوار المهبط وعم يهزّ براسو، بيظهر عندو مشكلي أطول مئو مع الحردوني اللي تجوزا وقت الكانت الدني عم
تشتي والشمس شارقا.^(٢٦) السجر الزغير العم يكبر، الشجرا اليتيمي العمر عشر سنين وبعدا زغيري لأنا خلقت ع كعب سجرا
عتيقا، ومحرومي من الشمس.
البراعم العم تخزق قشرتا وتطل ع الضو، ريحة الأرض الطيبي العم تنصّلي جسمي وزاكرتي من ريحة المذن. وإشيا وإشيا
عم يكملو قصيدة الصبا والزكريات بغابة مخيلتي .

ويا ريشتي إكتبي قبل ما تغيب شمس أيلول ع الزاكر

^(٢٥) مثل ما عملو فينا الأميركان والدول العم يدورو بفلكن الإقتصادي، العسكري والدموي – دوول المتوسط الشرقي قلنا شي من راينا فين بمقدمة "حف ع
الإيتم"، وهني اللي ربيو ع قصة الديب والخاروف اللي بتنتهي بموت الخاروف وانتصار الديب.

هالفابل اللي كاتبنا لافونتين من مناخ القصور بالجيل السابع عشر مجرمي:
لمن الصبي ع بنك المدرسي بيقرأ وبيحفضوه عن الغايب أئو الديب المفترس أكل الخاروف البري، بيخاف، وبيحط براسو أئو في واحد قوي بدّ ويشلحو
اللي معو. وبيصير فرخ الديب يكبر براسو الزغير. وبس ينزل ع الحياة **بيضطر** يعمل ديب ت ياخذ حقو. ومن هيك، الأرض متلاني دياب، شي كبار
وشي زغار.

أميركا اليوم ديب ع الدياب الزغار والزغار دياب علينا وكُن ع الشعب اللي ربوه ع أمثال معترا مثل: – ع قد بساطك مد إجريك – مين ما أخذ إمي
صار عمي – الإيد الما فيك ليا بوسا وادعي عليا بالكسر – ان جيت ع مطرح وشفئت عم يعبدو العجل جشّ وطعمو – من بعدي الطوفان – من بعد
حماري ما بنبت حشيش – جط راسك بين الروس وقول يا سيّاف ضروب – عند تغير الدول حفاظ راسك – قرش من ضهرو ولا يوم من عمرو... ألف
قلبي ولا ألف غلبي... إلخ...

هالفابل لازم تنشال من لغات الناس وكتبا وينحط مطرعا نهايي ثاني مثل: فزّ الديب عالخاروف ت ياكلو وقع بالنهر، غرق واختنق . ساعتنا الصبي
بيرتاح وبيقول: خي! الله قاصصو لأئو اعتدا ع الخاروف الضعيف. إزا عملت آدمي ما حدا بياخدلي حقي بالحياة وبتنتلي الأرض ناس أوادم.
هيك بالنسي للغراب والتعلب: إجا التعلب بدو يزلط الجبني بفرد مزا، علقت بزلا عيمو، اختنق ومات. وهيدي نهاية المحتال.

^(٢٦) أنا وصبي كنت إسمغن يقولو: بس تشتي الدني والشمس شارقا بيكون الحردون عم يجوز. وكنا نشوف الحردون وحردونتو ع الشوار عم يتشمسو.